



BOSNIA AND HERZEGOVINA  
MINISTRY OF COMMUNICATIONS AND TRANSPORT



Broj: 04-07-3-2514-1/24  
Sarajevo, 18.02.2025. godine

BOSNA I HERCEGOVINA  
PARLAMENTARNA SKUPŠTINA  
PREDSTAVNIČKI DOM  
KOMISIJA ZA SAOBRAĆAJ I KOMUNIKACIJE  
n/r predsjedavajućeg  
Trg BiH 1, 71000 Sarajevo

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO  
18-02-2025

Organizaciona jedinica	Klasifikaciona oznaka	Redni broj	Broj priloga
01/50-	50-3-	1949/24	

015-29-2170/24

**PREDMET: Zaključak Komisije za saobraćaj i komunikacije Predstavničkog doma – odgovor, dostavlja se**

**Veza:** Vaš akt broj 01/50-50-3-1949/24 od 22.10.2024. godine

Ministarstvo komunikacija i prometa Bosne i Hercegovine zaprimilo je vaš akt, broj i datum veze, kojim je zatraženo da sačinimo cjelovitu Informaciju o kršenju Zakona o Javnom radiotelevizijskom sistemu Bosne i Hercegovine, koja bi sadržavala sve aspekte ovog problema, uključujući građansko-pravni, krivično-pravni i upravno-pravni aspekt.

S tim u vezi, u prilogu ovog dopisa dostavljamo traženu Informaciju u pisanoj formi.



MINISTAR

Edin Forto

**Prilog:**

- kao u tekstu

**Dostavljeno:**

- naslovu
- 01, 02, 03, 04, 07
- a/a

## **INFORMACIJA**

### **o problemima u provođenju Zakona o Javnom radiotelevizijskom sistemu Bosne i Hercegovine**

Ministarstvo komunikacija i prometa Bosne i Hercegovine (u daljnjem tekstu: Ministarstvo) je zaprimilo dopis Komisije za saobraćaj i komunikacije Predstavničkog doma Parlamentarne skupštine Bosne i Hercegovine (u daljnjem tekstu: Komisija) broj 01/5-50-3-1949/24 od 22. 10. 2024. godine. Navedenim dopisom se od Ministarstva traži da sačini i Komisiji dostavi „*cjelovitu Informaciju o kršenju Zakona o Javnom radiotelevizijskom sistemu Bosne i Hercegovine, koja bi sadržavala sve aspekte ovog problema, uključujući građansko-pravni, krivično-pravni i upravno-pravni aspekt*“.

Napominjemo da Ministarstvo nije nadležno za provođenje Zakona o javnom radiotelevizijskom sistemu Bosne i Hercegovine i Zakona o javnom radiotelevizijskom servisu Bosne i Hercegovine niti vrši nadzor nad provođenjem ovih propisa. Navedeni zakoni nisu propisali obavezu javnim RTV servisima (BHRT, RTFBiH i RTRS) da ovom Ministarstvu podnose programe rada i izvještaje o radu, kao i o svom finansijskom poslovanju. U skladu s tim, ova informacija je pripremljena isključivo na osnovu javno dostupnih podataka, izvještaja o radu i poslovanju javnih RTV servisa u BiH, te različitih informacija pripremljenih od strane Javnih RTV u BiH u okviru svojih zakonskih obaveza. Sadržaj ove informacije nije niti se može smatrati konačnim sudom Ministarstva, već je iznesen u cilju prikaza dostupnih činjenica.

#### **1. UVOD**

Predmetna oblast uređena je Zakonom o javnom radiotelevizijskom sistemu Bosne i Hercegovine (“Službeni glasnik BiH”, br. 78/05, 35/09, 32/10, 51/15 i 25/16) (u daljem tekstu: Zakon o sistemu) i Zakonom o javnom radiotelevizijskom servisu Bosne i Hercegovine (“Službeni glasnik BiH”, br. 92/05 i 32/10), (u daljem tekstu: Zakon o servisu).

Zakonom o sistemu uređuju se Javni radio-televizijski sistem u Bosni i Hercegovini (u daljem tekstu: JRTS Bosne i Hercegovine) i odnosi tri javna RTV servisa i zajedničkog pravnog subjekta u okviru tog sistema, kao i njegova djelatnost i organizacija (član 1.).

Članom 3. Zakona o sistemu propisano je da sistem javnog emitiranja u Bosni i Hercegovini sačinjavaju Radio-televizija Bosne i Hercegovine (u daljem tekstu: BHRT) kao Javni RTV servis Bosne i Hercegovine, Radio-televizija Federacije Bosne i Hercegovine (u daljem tekstu: RTFBiH) kao Javni RTV servis Federacije Bosne i Hercegovine, Radio-televizija Republike Srpske (u daljem tekstu: RTRS) kao Javni RTV servis Republike Srpske i Korporacija javnih RTV servisa BiH (u daljem tekstu: Korporacija). Zakonom je propisano da će zakoni o BHRT, RTFBiH i RTRS biti usklađeni sa odredbama Zakona o sistemu.

Zakonom o servisu uređuje se Javni radiotelevizijski servis Bosne i Hercegovine, kao i njegova registracija, djelatnost i organizacija.

Narodna skupština Republike Srpske je 2006. godine usvojila Zakon o Radioteleviziji Republike Srpske („Službeni glasnik Republike Srpske“, broj 49/06; u daljem tekstu: Zakon o RTRS) a

Parlament Federacije Bosne i Hercegovine je 2008. godine usvojio Zakon o Javnom radiotelevizijskom servisu Federacije Bosne i Hercegovine („Službeni glasnik Federacije BiH“, broj 48/08; u daljem tekstu: Zakon o RTV FBiH).

## **2. ODBOR SISTEMA I KORPORACIJA**

Zakonom o sistemu je propisano da se odnosi između javnih RTV servisa reguliraju tim zakonom. Obaveza Javnih RTV servisa je da registruju Korporaciju na državnom nivou (član 6. stav (2)) a Zakonom su propisane i nadležnosti koje Korporacija ima u ime sva tri javna RTV servisa (stav (3)).

Članom 7. Zakona o sistemu uspostavljen je Odbor Sistema koji se sastoji od 12 članova. Odbor Sistema sačinjavaju svi članovi upravnih odbora javnih RTV servisa (po četiri člana iz svakog javnog RTV servisa), koji su članovi Odbora Sistema po službenoj dužnosti. Odborom Sistema predsjedava predsjedavajući Upravnog odbora Javnog RTV servisa Bosne i Hercegovine.

Nadležnost Odbora Sistema normirana je članom 8. Zakona o sistemu. Odbor Sistema ima ulogu nadzornog organa Korporacije i, između ostalog, ima sljedeće nadležnosti i dužnosti u pogledu zajedničkog pravnog subjekta - Korporacije: imenuje i razrješava generalnog direktora Korporacije, odobrava imenovanje lica koja su direktno odgovorna generalnom direktoru Korporacije, usvaja Statut Korporacije, odobrava strategiju i politiku poslovanja Korporacije u skladu s ovim zakonom i dozvolom Sistema, osigurava izvršenje važećih uslova dozvole koju je izdala Regulatorna agencija za komunikacije BiH (u daljnjem tekstu: Regulatorna agencija), odobrava rashode dispozicije i investicije u skladu sa Statutom, odobrava godišnji finansijski plan i budžet Korporacije, usvaja izvještaj o finansijskom poslovanju i radi u najboljem interesu Korporacije kada, kao nadzorni organ Korporacije, donosi odluke.

Odbor Sistema može punovažno odlučivati ako sjednici prisustvuje najmanje sedam članova (kvorum) iz sva tri javna RTV servisa. Odbor Sistema odluke donosi većinom glasova prisutnih članova. U slučaju istog broja glasova, odlučujući je glas predsjedavajućeg Odbora Sistema. Odbor Sistema sastaje se najmanje jedanput mjesečno, mijenjajući mjesto održavanja sjednica između sjedišta javnih RTV servisa.

Nakon stupanja na snagu Zakona o sistemu, pokrenuta je procedura izbora i imenovanja upravnih tijela u svakom od javnih RTV servisa, što je u konačnici za rezultat imalo prolongiranje formiranja Odbora Sistema.

Konstituirajuća sjednica Odbora Sistema održana je 11. 8. 2009. godine, čiji je glavni zadatak bio uspostava Korporacije. Jedini rezultat bio je usvajanje privremenog Poslovnika o radu Odbora Sistema koji će do formiranja Korporacije kordinirati poslove naplate i raspodjele RTV takse, godišnje revizije naplate RTV takse, digitalizacije prijenosne mreže i javnih servisa, donošenje uređivačkih načela i drugih pitanja od interesa za javne servise. Međutim, i u tako suženom djelokrugu poslova, Odbor Sistema praktično skoro prestaje s radom u maju 2019. godine.

Nefunkcioniranje Odbora Sistema odražava se prije svega na problematiku naplate i raspodjele RTV takse i digitalizacije javnih emitera, što su osnovne nadležnosti ovog tijela. Također, Odbor Sistema trebao je da upravlja Korporacijom koja će se baviti logistikom u ime i za račun javnih servisa. Iako je formiranje Korporacije bila zakonska obaveza, ovo zajedničko tijelo nikada nije formirano.

Prvih godina nakon usvajanja Zakona o sistemu, opravdanje za nepoštivanje zakonskih rokova bilo je kašnjenje donošenja entiteskih zakona o javnim RTV servisima.

Tokom predhodnih godina UO BHRT uputio je nekoliko inicijativa za održavanje sjednice Odbora Sistema. UO RTRS-a se tokom 2019. i 2020. godine izjašnjavao o neprihvatanju termina sjednica uz obrazloženje da im ne odgovara termin održavanja sjednice jer pojedini članovi nisu u mogućnosti prisustvovati na sjednici zbog prethodno preuzetih obaveza, ali su svaki put podržavali nastavak rada Odbora Sistema.

Posljednja sjednica Odbora Sistema je održana 16. 5. 2023.godine koja je rezultirala jednim zaključkom da se redovno održavaju sjednice.

Predsjedavajući UO BHRT je novoizabranom sazivu UO RTRS-a uputio poziv za održavanje sjednice Odbora Sistema, ali UO RTRS-a se nije odazvao uz obrazloženje da nisu ispunjeni uslovi za održavanje sjednice Odbora Sistema, jer UO RTV FBiH nema niti jednog člana u mandatu.

Važno je napomenuti da UO RTV FBiH od augusta 2014. godine funkcioniše samo s jednim članom kojem je mandat istekao sredinom juna 2013. godine. Odbor Sistema može punovažno odlučivati ako sjednici prisustvuje najmanje sedam članova iz sva tri javna RTV servisa.

Od konstituisanja Odbora Sistema urađeno je skoro dvadeset različitih verzija Statuta Korporacije, ali isti nije donesen. Čak i uz medijaciju od strane međunarodnih kancelarija u BiH (OHR i delegacija EU) i angažiranje stranih eksperata, nije donesen Statut Korporacije.

S obzirom da prethodno navedene medijacije nisu imale pozitivan ishod, Ministarstvo komunikacija i prometa Bosne i Hercegovine (u daljnjem tekstu: Ministarstvo) je pokrenulo aktivnosti s Odborom Sistema s ciljem iznalaženja načina za donošenje Statuta i zatražilo od Odbora Sistema da dostavi maksimalno usaglašen sadržaj prijedloga Statuta. Različiti stavovi upravnih odbora Javnih RTV servisa o statusu Korporacije su bili glavna prepreka za donošenje Statuta. Članovi Odbora Sistema iz RTRS-a su predložili da Korporacija bude formirana kao Konzorcij koji nema status pravnog subjekta, a što nije u skladu s članom 42. stav (3) Zakona o sistemu, dok su članovi Odbora Sistema iz BHRT-a i RTV FBiH predložili Statut koji je sadržavao sve elemente propisane Zakonom o sistemu.

Također, zakoni o RTV FBiH i RTRS su neusaglašeni sa Zakonom o sistemu u više segmenata, a prvenstveno u domenu procedura izbora i imenovanja upravnih odbora, ubiranja i raspodjele marketinga, nadležnosti u vlasništvu nad imovinom.

### **3. FINANSIRANJE JAVNIH RTV SERVISA**

Članom 18. Zakona o sistemu propisano je da način naplate RTV takse određuje i uspostavlja Odbor Sistema, a članom 23. Zakona je propisana raspodjela RTV takse i prihoda od marketinškog oglašavanja. Prikupljena finansijska sredstva se uplaćuju na jedinstveni račun, s kojega se ista, bez odlaganja, raspodjeljuju u omjeru 50% BHRT-u, 25 % RTRS-u i 25% RTFBiH. Odbor Sistema, između ostalog, ima nadležnost u pogledu utvrđivanja usaglašenog prijedloga iznosa RTV takse i praćenja naplate iste.

U periodu 2005. do polovine 2017. godine, samo sredstva prikupljana putem tri telekom operatera, uplaćivana su na jedinstveni račun, koji je u skladu sa Zakonom o sistemu, uz saglasnost Odbora Sistema otvoren u BHRT-u i sa kojeg se vršila zakonom utvrdjena raspodjela. Sredstva RTV takse koja su u ovom periodu prikupljali entitetski emiteri putem vlastitih službi ili prinudnom naplatom

od početka primjene Zakona o sistemu, zadržavana su na računima RTV FBiH i RTRS-a, odnosno nije se postupilo u skladu s članom 23. Zakona.

Kako bi se povećali prihodi i spriječila kršenja Zakona o sistemu, tri generalna direktora su 21. 11. 2009. godine potpisali Odluku o načinu raspodjele troškova naplatnih službi RTV takse. Prema ovoj Odluci prikupljena sredstva od strane naplatnih službi RTV FBiH i RTRS trebala su biti uplaćena bez odlaganja na jedinstveni račun, a troškovi rada službi bi se priznavali na osnovu godišnjeg plana koji će se usvajati do 01.11. tekuće godine za narednu kalendarsku godinu. Uprkos preciznoj odredbi i međusobnom dogovoru, entitetski emiteri nisu poštovali zakonske odredbe, kao ni navedenu Odluku u cijelosti i uskraćivali su BHRT za naplaćeni dio prihoda koji mu pripada. Tako je RTV FBiH djelimično ispunjavala zakonsku obavezu uplatom dijela prikupljenih sredstava na jedinstveni račun, dok je RTRS zadržavala prikupljena sredstva putem inkasa (naplata putem službi pretplate entitetskih emitera) na vlastitom računu.

Konstantno zadržavanje sredstava RTV takse prikupljene putem inkasa na vlastitim računima RTRS-a i RTV FBiH i neplaćanjem obaveza RTV FBiH za pružene usluge BHRT-a, od početka primjene Zakona o sistemu do kraja 2016. godine stvorio se manjak novčanih sredstava na računima BHRT-a u iznosu od 30,5 miliona KM koji je potpuno blokirao BHRT u pravovremenom izmirenju obaveza prema dobavljačima.

Pored navedenog, sva tri Javna RTV servisa se suočavaju sa dodatnim problemom prouzrokovanim padom naplate RTV takse putem telekom operatora jer se konstantno povećavao broj pretplatnika koji prelaze na alternativne oblike fiksne telefonije.

Dom naroda Parlamentarne skupštine Bosne i Hercegovine, na sjednici održanoj 30. 6. 2016. godine nije usvojio Zakon o izmjeni Zakona o sistemu koji se odnosio na produženje obaveze telekom operatorima da naplaćuju RTV taksu.

HT Eronet je odustao od prikupljanja RTV takse u septembru 2016. godine, M:tel u junu 2017. godine, a BH telekom u julu 2017. godine. Ovim se završava naplata RTV takse putem telekom operatora, a BHRT je ostao bez prihoda jer RTRS i RTV FBiH vrše naplatu RTV takse putem vlastitih službi i u potpunosti zadržavaju prikupljena finansijska sredstva.

U cilju osiguravanja kvalitetnog modela naplate RTV takse, javni RTV servisi su dostavljali različite prijedloge naplate RTV takse Odboru Sistema, od kojih je kao najprihvatljiviji ocijenjen model naplate putem elektrodistributivnih preduzeća i kao takav je prihvaćen od strane Odbora Sistema i potvrđen od strane Evropske komisije kao jedini prihvatljiv u postojećim uslovima u BiH.

RTRS je početkom 2017. godine zaključio ugovor o naplati RTV takse sa Poštama Republike Srpske, bez upoznavanja i saglasnosti Odbora Sistema. Nakon toga su BHRT i RTV FBiH zaključile ugovor o naplati RTV takse sa JP Elektroprivredom BiH, na što je Odbor Sistema dao saglasnost. BHRT i RTV FBiH su se obratili i JP Elektroprivreda HZ HB kako bi na isti način riješili naplatu RTV takse za preostali dio FBiH koja je pokrivena elektrodistributivnom mrežom HZ HB Mostar, ali odgovora nije bilo.

Također, BHRT i RTV FBiH su uputili poziv Odboru Sistema i RTRS-u da se pokuša iznaći način naplate RTV takse na teritoriji RS putem JP Elektroprivrede RS u cilju stvaranja jedinstvenog načina naplate RTV takse, putem jedinstvenog računa sa kojeg bi se vršila zakonski definirana raspodjela na sva tri javna RTV servisa. Na ovaj prijedlog Odbor Sistema nije dao saglasnost, niti je RTRS odgovorio.

Rukovodstvo BHRT-a i RTV FBiH je potpisalo ugovor sa JP EP BiH o prikupljanju RTV takse na teritoriji Federacije BiH na kojoj posluje JP EP BiH, prikupljena sredstva se uplaćuju na račun RTV FBiH, a potom se 50% sredstava uplaćuje BHRT-u.

Prema Izvještaju o finansijskom poslovanju BHRT-a za period 1. 1. - 31. 12. 2023. godine (broj 100-05-26/24 od 9. 5. 2024. godine), preuzetog sa službene internet stranice Komisije za saobraćaj i komunikacije Predstavničkog doma Parlamentarne skupštine Bosne i Hercegovine, ukupna nenaplativa potraživanja od RTRS-a na dan 31.12.2023. godine iznose 83.684.652 KM, a od RTV FBiH 15.121.680 KM. Sva ova potraživanja su utužena, nema konačnih presuda, jer su sudski postupci u toku.

Također, bitno je naglasiti da sva tri javna RTV servisa vrše naplatu marketinga te da prikupljena sredstva ne uplaćuju na jedinstveni račun, već prikupljena sredstva zadržavaju za sebe, što je u suprotnosti sa članom 23. st. (4), (5) i (6) Zakona o sistemu, koji predviđa raspodjelu prihoda od marketinga u omjeru 50% BHRT, 25% RTRS i 25% RTV FBiH.

#### **4. ČLANSTVO U EVROPSKOJ UNIJI ZA RADIO-DIFUZIJU - EBU**

Članom 11. Zakona o servisu propisano je da Korporacija zastupa interese BHRT-a u međunarodnim radiodifuznim organizacijama i asocijacijama te da je BHRT dužan osigurati korištenje prava i izvršavanje obaveza koje proizilaze iz članstva u EBU i iz Konvencije o prekograničnoj televiziji. Korporacija je zajednička upravljačka struktura između javnih RTV servisa, koja je odgovorna, između ostalog, za prava u vezi sa stranim programima.

Javni RTV servisi primarno se finansiraju od RTV takse i marketinga čije je ubiranje i raspodjela propisana Zakonom o sistemu. Nepoštivanje zakonskih odredbi u domenu raspodjele finansijskih sredstava od strane javnih RTV servisa, najviše se odražava na BHRT i stvara nedostatak potrebnih finansijskih sredstava za održivo poslovanje ovog javnog RTV servisa. Nedostatak finansijskih sredstava se odrazio i na neplaćanje finansijskih obaveza prema EBU i to za godišnju naknadu za članstvo u EBU, kao i pojedinačne naknade za prijenos televizijskih, sportskih i drugih prava i usluge koje su pružene od 2005. godine, te je došlo do gomilanja dugovanja.

BHRT i EBU su 2014. godine dogovorili plan izmirenja duga, koji BHRT nije bio u stanju provesti, što je na kraju dovelo do toga da je EBU podnio tužbu protiv BHRT.

Dana 30. 12. 2016. godine EBU, podnijela je putem punomoćnika Tužbu radi duga protiv BHRT-a, vrijednost spora 12.198.170,70 KM. Tužba se odnosila na dug BHRT-a za godišnju naknadu za članstvo u EBU, kao i pojedinačne naknade za prijenos televizijskih sportskih i drugih prava i usluge koje su pružene od 2005. godine. BHRT zbog teške finansijske situacije u kojoj se u tom periodu nalazio, nije bio u mogućnosti redovno izmirivati obaveze prema EBU.

BHRT je pomenute okolnosti naveo i u svom Odgovoru na tužbu od 6. 2. 2017. godine te je iskazao spremnost na postizanje dogovora o vansudskom rješenju ovog spora.

Prvostepena presuda je donesena 2018. godine kada je Opštinski sud presudio da je BHRT dužna na osnovu glavnog duga isplatiti 9.853.998,05 KM sa zakonskom zateznom kamatom. BHRT je potom uložila Žalbu, međutim, drugostepenom presudom potvrđena je prvostepena presuda.

Opštinski sud je 2022. godine donio Rješenje o izvršenju gdje će se nakon procjene vrijednosti i prodajom nekretnina u vlasništvu BHRT-a vratiti dug. U martu 2024. godine sačinjen je nalaz i mišljenje vještaka te je utvrđena vrijednost devet nekretnina u vlasništvu BHRT-a, a ona iznosi

165.564.697,20 KM. BHRT je uložila Žalbu na Rješenje o izvršenju Suda, međutim, još uvijek nije donesena sudska odluka.

BHRT je svojim dopisom (broj: 100-00-1263/24 od 3.7.2024. godine) obavijestio Ministarstvo i Parlamentarnu skupštinu Bosne i Hercegovine da je Opštinski sud u Sarajevu svojim aktom 65 0 Ip 969300 22 Ip od 18. 6. 2024. godine u predmetu tražitelja izvršenja EBU protiv izvršenika BHRT odredio prvu prodaju nekretnina, zakazanu za dan 25. 9. 2024. godine, upisanih u ZK ulošku broj: 7222 KO SP-Dolac i 8509 KO SP-Dolac, a u svrhu isplate duga BHRT-a u iznosu od 16.360.851,18 KM prema EBU. Prodaja nekretnina koja je bila zakazana za 25. septembar 2024. godine u 09:45 sati, nije održana.

Ukupan iznos koji EBU potražuje sa obračunatim zateznim kamatama je 16.360.851,18 KM. BHRT u žalbi osporava iznos, međutim, ona neće utjecati na izvršenje po Rješenju Suda, što zapravo znači da će BHRT morati prodati nekretnine, dok se iznos duga na osnovu Žalbe može izmijeniti.

Postupajući po zaključku Komisije za saobraćaj i komunikacije Predstavničkog doma Parlamentarne skupštine Bosne i Hercegovine (akt broj: 01/5-50-18-921,3/24 od 28. 8. 2024. godine), Ministarstvo se obratilo Pravobranilaštvu Bosne i Hercegovine s molbom za dostavu podataka o aktivnostima po navedenom pitanju, a Pravobranilaštvo je svojim aktom (broj 02-1-U 395/24 od 23.09.2024. godine) obavijestilo Ministarstvo da su poduzeli hitne pravne korake na zaštiti imovine i imovinskih interesa Bosne i Hercegovine. U predmetnom izvršnom postupku Pravobranilaštvo Bosne i Hercegovine zastupa državu Bosnu i Hercegovinu i štiti imovinu države Bosne i Hercegovine, a BHRT pred sudom zastupa opunomoćena advokatska kancelarija. Pravobranilaštvo Bosne i Hercegovine je podnijelo Prigovor protiv rješenja o izvršenju i Zahtjev za obustavu prodaje nekretnina, s obzirom da se iz istorijata zemljišnoknjižnih izvadaka nekretnina koje su predmet izvršenja može utvrditi da su iste bile upisane kao „državno vlasništvo“ sa dijelom 1/1.

Također, Pravobranilaštvo Bosne i Hercegovine je ranije pokrenulo sporove pred Kantonalnim sudom u Sarajevu i Ustavnim sudom Bosne i Hercegovine u vezi s predmetnim nekretninama iz ZK uloška br. 8509, K.O. SP\_Dolac, a u skladu s odredbama Zakona o privremenoj zabrani raspolaganja državnom imovinom Bosne i Hercegovine („Službeni glasnik BiH“, br. 18/05, 29/06, 85/06, 32/07, 41/07, 74/07, 99/07, 58/08 i 22/22).

Opštinski sud u Sarajevu je svojim Rješenjem broj: 65 0 P 1124003 24 Mo od 26.11.2024. godine odredio privremenu mjeru osiguranja i odlaže izvršenje u predmetu Opštinskog suda u Sarajevu broj 65 0 I 969300 22 I, čime se uvodi mjera zabrane raspolaganja imovinom BHRT-a.

Aktom broj 02-1-29-1-PBiH-432/24 od 30. 10. 2024. godine Pravobranilaštvo je obavijestilo Ministarstvo da je primilo Zaključak Općinskog suda u Sarajevu (broj 65 0 Ip 969300 22 Ip od 23. 10. 2024. godine) kojim se Bosna i Hercegovina upućuje da u parničnom postupku dokaže svoje tvrdnje iz pomenutog prigovora protiv rješenja o izvršenju.

S tim u vezi, Pravobranilaštvo Bosne i Hercegovine će u najkraćem roku podnijeti tužbu nadležnom sudu u Sarajevu i tražiti da se izvršenje na nekretninama koje su bile upisane kao vlasništvo Bosne i Hercegovine, proglasi nedopuštenim i ukine rješenje o izvršenju po prijedlogu tražitelja izvršenja EBU protiv BHRT.

Ministarstvo je u novembru 2024. godine pripremlilo i dostavilo Generalnom sekretarijatu Vijeća ministara Bosne i Hercegovine Informaciju o dugovanju Javnog radiotelevizijskog servisa Bosne i Hercegovine prema Evropskoj radiodifuznoj uniji (EBU) sa prijedlogom zaključaka kojim bi se

Ministarstvo finansija i trezora Bosne i Hercegovine zadužilo da osigura sredstava u Budžetu institucija Bosne i Hercegovine i međunarodnih obaveza Bosne i Hercegovine za 2025. godinu za isplatu dijela duga prema Evropskoj radiodifuznoj uniji (EBU), s ciljem zaštite javnog interesa i osiguranja nesmetanog rada BHRT-a, a time i ostala dva javna RTV servisa. Također, jedan od predloženih zaključaka je da se zaduži Ministarstvo finansija i trezora Bosne i Hercegovine da u saradnji s Ministarstvom komunikacija i prometa Bosne i Hercegovine pokrene aktivnosti na zaključivanju ugovora s Evropskom radiodifuznom unijom (EBU) o načinu izmirenja dugovanja Javnog radiotelevizijskog servisa Bosne i Hercegovine, a koji će predstavljati osnov za osiguranje sredstva u Budžetu institucija Bosne i Hercegovine i međunarodnih obaveza Bosne i Hercegovine.

Zbog neplaćanja obaveza, BHRT je pod sankcijama EBU, zbog čega su sva tri javna emitera na gubitku, jer EBU omogućava pristup ekskluzivnom sadržaju svjetske klase, u rasponu od ekskluzivnih sportskih prava (Svjetsko prvenstvo u nogometu, Olimpijske igre, takmičenja u plivanju, atletici, itd...) do razmjene vijesti, muzičkih, dokumentarnih, igranih i dječijih programa.

Kako bi se dijelom sanirao dug prema EBU, u proteklom periodu Vijeće ministara Bosne i Hercegovine je na prijedlog Ministarstva, na 63. sjednici, održanoj 7. jula 2016. godine, donijelo Odluku o upotrebi dijela sredstava akumuliranog viška prihodima nad rashodima Regulatorne agencije za komunikacije Bosne i Hercegovine („Službeni glasnik BiH“ broj 9/17), kojom su BHRT-u doznačena sredstva za saniranje dijela duga prema EBU u iznosu od 1.452.087,00 KM.

## 5. ZAKLJUČAK

Prema dostupnim informacijama, u nastavku teksta navedene su relevantne odredbe Zakona o sistemu koje se ne provode u potpunosti:

1. Nije potpun Sistem Javnog RTV emitovanja u Bosni i Hercegovini jer nije registrirana Korporacija (član 3. stav (1) tačka d) i član 6. stav (2)), te se ne provode odredbe Zakona o sistemu vezane za osnivanje, organizaciju i rad Korporacije (čl. 12., 13., 14. i 15.);
2. S obzirom da Korporacija nije registrirana, Odbor Sistema ne izvršava zakonske obaveze vezane za istu (član 8. stav (2) tačke a), b), c), d), g) i i), uključujući i član 42. st. (2) i (3));
3. Odbor Sistema ne održava sjednice minimalno jednom mjesečno (član 8. stav (4));
4. Zakon o RTRS i Zakon o RTV FBiH nisu u potpunosti usklađeni sa Zakonom o sistemu (član 3. stav (2));
5. Nema egzaktnih podataka o stepenu naplate mjesečne RTV takse na teritoriji Bosne i Hercegovine (član 17. stav (1));
6. Naplaćena RTV taksa se ne raspoređuje u skladu s članom 23. Zakona o sistemu (član 18. stav (4));
7. Ukupni neto dohodak od prodaje marketinškog oglašavanja se ne uplaćuje na jedinstveni račun (član 23. stav (2)).